

四庫全書

集部

欽定四庫全書

聖祖仁皇帝御製文第四集卷三目錄

勅諭

諭吏部

諭刑部

諭大學士溫達松柱李光地蕭永藻王拱

諭內閣

諭大學士溫達松柱李光地蕭永藻王拱

諭大學士溫達松柱李光地蕭永藻王揆

諭大學士溫達松柱等

諭大學士溫達松柱學士舒蘭馬良綽奇常泰

諭大學士松柱李光地蕭永藻王揆等

諭大學士溫達松柱李光地蕭永藻王揆學士舒

蘭馬良傳爾呼納綽奇常泰彭始搏鄒士璉沈

涵兼管翰林院事左都御史揆叙侍郎湯右曾

等

諭戶部

諭大學士溫達松柱李光地蕭永藻王拱學士綽

奇常泰沈涵等

諭大學士溫達等

諭大學士溫達等

諭禮部

欽定四庫全書

聖祖仁皇帝御製文第四集卷三

勅諭

諭吏部

川陝總督殷泰前曾因病奏請解任調理朕念殷泰清
潔自持約束屬下恩威並用陝省軍民固不感戴朕甚
愛惜令在任調攝已有諭旨今病勢未能即愈總督印
務雖有巡撫署理但陝西地方遼濶最屬緊要總督員

缺不可久懸殷泰著解任湖廣總督鄂海屢任陝西熟諳地方兵民情性俱所深悉且才具頗優將鄂海調補川陝總督特諭康熙五十二年四月初七日

諭刑部

朕聽政日久凡果係裨益民生之事有所聞見立即施行其聽之似是而鮮實惠者斷不行也京師及各省惟不稽延事件速行料理則凡事不至叢脞自無淹滯牽累之弊此乃本源要務也今趙申喬惟以農忙為言不

諳甚矣若謂四月至七月有悞農功則八月正北方收穫田穀之候在南方係禾苗正長之時至廣東福建十月間始行刈稻種麥直至二月麥秋農民未嘗少有休暇也且有多事大吏及督撫等收受詞狀不預加詳察不速行審理案牘堆積完結無期終歲耕商為之停廢小民紛紛嗟怨遲悞事件豈獨四月以後乎即去冬詞訟延至五月亦妨農時前此恤刑之事每致淹遲以故停止此事亦與相似所奏無益也康熙五十二年四

月初八日

諭大學士溫達松柱李光地蕭永藻王掞

朕前一聞廣東米價騰貴即降諭旨將漕糧截留由海運濟并作何速行賑濟之處交與九卿會議發常平倉積穀三十萬石平價糶賣已經交與趙申喬等前往辦理今將軍管源忠又以米價騰貴繕摺具奏及朕詳問巡撫滿丕遣來奏摺家人口稱彼處雨水調勻麥稻茂盛現今收麥等語滿丕今又發常平倉積穀二十萬石

見在平糶趙申喬等再到彼處賑濟民間斷不致乏食
俟八九月北風起時動撥江浙兩省捐納米三十萬石
用水師營戰船裝載由海運往不惟米石可以濟民而
兵丁亦得習練水師事務若廣東豐收將此運至米石
一半存貯粵省一半分運閩省備貯庶於民生大有裨
益爾等與九卿會議具奏特諭康熙五十二年五月初
三日

諭內閣

提督康泰奏稱蜀省一碗水地方聚集萬餘人開礦隨
逐隨聚差官力行驅逐等因繕摺具奏朕念此等偷開
礦廠之徒皆係無室可居無田可耕乏產貧民每日所
得錙銖以為養生之計若將此等乏產貧民盡行禁止
則伊等何以為生果如滇省礦廠所出頗多亦可貲助
兵餉此處所出無多該地方文武官員作何設法使窮
民獲有微利養贍生命但不得聚衆生事妄行不法似
屬可行爾等與九卿會議具奏康熙五十二年五月初

三日

諭大學士溫達松柱李光地蕭永藻王掞

武官係朕親驗騎射及人材壯健補授故爾識認文官
皆係臨民之官關係尤重凡掣籤月官悉行引見應補
授者俱行補授其年老不及者令原品休致惟在外陞
補等官概不引見伊等賢否豈得周知嗣後作何驗看
辨別爾等與九卿會議具奏康熙五十二年五月初三

日

諭大學士溫達松柱李光地蕭永藻王掞

今年八月時將江南捐納米內發二十萬石用鎮海將軍標下戰船及松江提標戰船狼山鎮標戰船裝載着總兵穆廷棧總管船隻浙江捐納米內撥十萬石用浙江提標戰船及定海鎮標戰船裝載着總兵吳陞總管船隻俱運至廣省此運米兵丁口糧及回汛時或遇風勢不順行船有阻亦未可定所需口糧亦宜預備帶往不得動用賑濟額米江南織造署內朕曾預脩米一萬

石如八九月間江南有動用處則已如無所動用將此項米石亦應一併運去所缺米石朕另行補貯着行文該督撫詳悉速議具奏康熙五十二年五月初五日

諭大學士溫達松柱等

先經拿獲海賊俱已發遣寧古塔等處現今陳尚義一百餘人又來歸誠伊等俱係熟識水性海道之人盛京金州地方着設立水師營將伊等發往近據山東總兵李雄奏請裁伊標水師營戰船十隻即將所裁數內截

留數船分往金州看守地方巡防海洋似有裨益著滿漢九卿詹事科道會同確議具奏康熙五十二年閏五月初九日

諭大學士溫達松柱學士舒蘭馬良綽奇常泰

總督赫壽為廣東省運米所奏疏內以戰船今係大修之年俱各修理不堪應用請雇民船運米等語沿海各省設立戰船者特為防護地方裨益民生以備急需也今據稱戰船俱不堪用請雇民船可知戰船少而民間

貿易之鳥船多雖有修船之名徒致耗費錢糧况修一
戰船需用之錢糧甚多觀此將所修戰船或賣與民人
或雇與民人貿易并將民人破壞船隻頂補充數捏稱
修理亦未可定倘有用處將如之何此習相沿成風應
用之時恐必致遲悞著問九卿令會議以聞康熙五十
二年七月十二日

諭大學士松柱李光地蕭永藻王揆等

三年鄉會試原期得實學真才自必以研究經書義旨

為根本蓋四書五經皆聖人講理明道之書貫始徹終
無非精意近見鄉會試俱擇取冠冕吉祥語出題每多
宿構倖獲致讀書通經之士漸少今後闈中題目應不
拘忌諱庶難預作揣摩實學自出着九卿會議具奏康
熙五十二年十月十一日

諭大學士溫達松柱李光地蕭永藻王掞學士舒
蘭馬良傳爾呼納綽奇常泰彭始搏鄒士璉沈
涵兼管翰林院事左都御史揆叙侍郎湯右曾

等

翰林官關係緊要必讀書立品方稱厥職今翰林官甚多朕皆不識自講讀學士以下編檢以上及滿洲漢軍由進士選入翰林者其中或有不修行檢日事飲博及詩文書法全不究心又或督學典試分考聲名不好者爾等會同九卿詳查舉出即行黜退各省皆有翰林九卿豈無聞見毋容徇隱其現在散館庶吉士及教習進士內有此等人亦舉出革退康熙五十二年十月二十

九日

諭戶部

朕勤求民瘼無間遐邇雖在邊徼遠省偶有旱澇災傷無不訪察情形殫思賑救今歲直省各處俱獲收成惟廣東三水清遠高要高明四會五縣福建侯官縣福防廳所屬福右衛二處甘肅靖遠衛環縣鎮原縣固原州固原衛平涼縣崇信縣慶陽衛靈州所會寧縣寧夏中衛寧夏所古浪所一十四處今歲夏秋被災各督撫已

經奏聞雖各省地丁錢糧新經全免然一方災歎悉厯朕心艱食之際重以追呼朕所不忍其明年應徵廣東省三水等五縣額銀七萬七千九百兩零米一萬七千六百石零福建省侯官縣等二處額銀三萬六千六百兩零米六千四百石零甘肅靖遠衛等一十四處額銀四萬七千七百兩零糧八萬八千五百石零草八十四萬三百束零盡與蠲豁爾部即行文各督撫務須星速奉行即刻遍行曉諭俾民間無徵催之累肆力東作用

稱朕撫恤災黎至意倘有不肖有司奉行稽遲或借端別行科派使小民不霑實惠該督撫嚴察叅處如該督撫失察一併從重處分爾部即遵諭速行康熙五十二年十一月初七日

諭大學士溫達松柱李光地蕭永藻王掞學士綽奇常泰沈涵等

近見直隸各省考取武進士額數或一省偏多或一省偏少皆因不知其弓馬武藝止憑文章取中以致騎射

嫻熟諳習韜畧之人多有遺漏嗣後考取武進士不必
拘定額數俟天下會試武舉齊集京師令該部將各省
赴試到部武舉照例考試弓馬將合式武舉等實數查
明預行奏聞朕計省之大小人之多寡照考取文進士
例按省酌定取中武進士額數考取時就本省卷內擇
佳者照所定數取中如此則學習武藝弓馬優長者不
致遺漏矣康熙五十二年十一月初八日

諭大學士溫達等

文武考試雖曰兩途俱係選拔人才而習文之內亦有學習武畧善於騎射者習武之內亦有通曉制藝學問優長者如或拘於成例以文武兩途不令通融應試則不能各展所長必致遺漏真才嗣後文生員舉人內有情願改就武場考試者武生員舉人內有情願改就文場考試者應各聽其考試如此則各得施其所學文武兩途皆得真才矣著九卿詹事科道議奏康熙五十二年十一月初十日

諭大學士溫達等

地方文武官原為弭盜安民而設如平日綏輯得宜遇有草竊事發即時查拏誅滅何致劫奪若徒事招撫則官兵漸至疎忽草竊小賊益無忌憚於地方甚屬無益嗣後山海盜賊有真心嚮化自行投首者該督撫察明奏聞其遣人撫諭招來之處永行停止康熙五十二年十一月十六日

諭禮部

爾部於一切禁止事件應加意遵行務期得當覽僧官等呈甚是現今京師各種僧人賢愚不一前有誑稱善知識等名與諸王大臣往來生事者爾部不能稽查言官不能糾劾乃推諉僧官不能奉行深為溺職僧錄司職甚卑微各處遊僧嘗脅制僧官至無容身之地若依此奏愈至查禁無人各種僧衆益恣意肆行矣着再詳議具奏康熙五十二年十二月十六日

聖祖仁皇帝御製文第四集卷三

欽定四庫全書

集部

聖祖仁皇帝御製文第四集卷六

四至

臣永瑤恭校

侍讀臣孫球覆勘

覆校官中書臣龔禔身

校對官主簿臣郭祚熾

謄錄舉人臣蒲炯

欽定四庫全書

聖祖仁皇帝御製文第四集卷四目錄

勅諭

諭大學士等

諭大學士溫達松柱李光地蕭永藻王揆等

諭大學士松柱左都御史兼翰林院掌院學士揆

叙

諭戶部

諭禮部

諭大學士松柱等

諭領侍衛內大臣等

諭刑部

諭大學士九卿詹事科道

諭刑部

諭南書房翰林

諭大學士松柱李光地蕭永藻王揆

諭戶部

諭戶部

諭大學士松柱等

諭大學士溫達松柱李光地蕭永藻王掞

諭理藩院

諭大學士學士九卿詹事科道

欽定四庫全書

聖祖仁皇帝御製文第四集卷四

勅諭

諭大學士等

光祿寺先前每年需用錢糧六七十萬陸續節省核減
一年止用四五萬兩且工部先前每年需用錢糧百萬
有餘亦經陸續節省核減止用十五萬餘兩以致琉璃
窑石灰監督鋪戶等各所司之事不能承辦此雖云節

省核減戶部錢糧反多致缺欠着九卿詹事科道將庫帑作何設法填補鋪戶如何能辦伊等差使之處一併詳議具奏康熙五十二年十二月十八日

諭大學士溫達松柱李光地蕭永藻王揆等

此前往臺灣換班人等乘坐船隻遭風擊碎部議照例着落武官賠補海面風勢險阻倉卒之間豈人力所能馭若與賊對敵失陷被其焚劫應令照例賠補似此遭風損壞者並令賠補殊屬冤抑自後除遇賊不能剿捕

損失船隻或因船被賊搶捏報遭風者議罪外仍照例
令其賠補如果不幸遭風沉溺賠補應從寬免其船上
溺死兵丁皆係因公殞命即有沒水幸得登岸者九死
一生亦可憐憫地方大吏宜酌量恩恤以示鼓勵着九
卿會議具奏康熙五十二年十二月二十日

諭大學士松柱左都御史兼翰林院掌院學士揆

叙

近見翰林等官告假者甚多庶吉士給假三年考時復

來如此去來任意所學安有進益此後除丁憂終養外
凡翰林庶吉士告假者應與致仕知縣一例現今教習
進士內有告假者亦應照此例再科道官員職任甚重
亦有任意告假回籍者爾等會同九卿一併議奏康熙
五十三年二月十四日

諭戶部

甘肅一帶地方去年春麥失收秋田亦歉經該督撫奏
報甚明其地俱係山田稍遇旱暵易致災荒是以舊歲

特沛恩澤蠲免租賦現在雖據該督撫設法賑濟借糶
資給牛種此外更應作何籌畫使小民得所永有裨益
著遣工部右侍郎常泰大理寺少卿陳汝咸到彼會同
該督撫詳察地方百姓情形確議具奏康熙五十三年
三月初四日

諭禮部

朕惟治天下以人心風俗為本而欲正人心厚風俗必
崇尚經學而嚴絕非聖之書此不易之理也近見坊間

多賣小說淫詞荒唐俚鄙瀆亂正理不但誘惑愚民即
縉紳士子未免游目而蠱心焉敗俗傷風所繫非細應
即通行嚴禁其書作何銷毀市賣者作何問罪着九卿
詹事科道會議具奏特諭康熙五十三年四月初四日

諭大學士松柱等

兩淮鹽課先欠一百八十餘萬兩自將李陳常補授運
使所欠銀兩俱各賠完李陳常做官甚好實能效力鹽
務將李陳常授為御史巡視兩淮一年鹽課江寧蘇州

織造二處應解銀兩仍照曹寅李煦解送餘剩者將曹
寅李煦商人欠有銀兩俱令清補李陳常原係九卿舉
出之員此運使員缺着九卿必如李陳常之人揀選保
舉具奏康熙五十三年五月初八日

諭領侍衛內大臣等

朕想喇藏汗一子前往策妄阿喇布坦處娶親一子現
在青海地方駐扎在策妄阿喇布坦處娶親之子策妄
阿喇布坦若託詞愛婿留住數年不令之歸再如駐扎

青海之子朕復憐愛留住伊處總無人矣豈不孤危况且喇藏汗年已近六十自當為其身計纔是伊之人少土伯特人甚多又兼秉性兇惡可保得常無事否喇藏將兇惡第巴殺死朕加褒獎封為扶教恭順汗伊真傾心內嚮不但朕知之即各處人亦皆知之但伊等厄魯特秉性猜疑又甚怠惰倘或事出不測朕雖憐伊伊雖倚朕此間地方甚遠相隔萬里救之不及事後徒貽悔耳即朕亦無法也朕此想甚屬遠大伊亦係曉事之人

身後事若不深謀防範斷乎不可朕為喇藏汗時常留意特諭康熙五十三年六月初五日

諭刑部

朕避暑口外駐蹕山庄素稱清涼之地還覺煩熱想京師自然更甚朕時以民生疾苦為念今天下承平農商樂業惟有罪人拘繫囹圄身被枷鎖當茲盛暑恐致疾疫軫念及此不勝惻然應將在京監禁罪囚少加寬恤獄中多置冰湯以解鬱暑其九門鎖禁人犯無論奉旨

亦着減其鎖條至枷號人犯限期未滿者暫行釋放候過暑時照限補滿爾部即遵諭速行以副朕法外施仁至意康熙五十三年六月十五日

諭大學士九卿詹事科道

朕聽政年久深悉民生利病凡國家要務無時不預為籌畫有奏摺人來朕皆詢問咸稱江南曠旱江浙米價亦不甚賤今春山東河南田麥歉收交冬米必騰貴彼時即亟為料理亦不能及徒空勞爾朕詳悉思維將漕

糧撥三十萬石江寧府十萬石蘇州府八萬石淮安府揚州府共五萬石杭州府五萬石河南開封府二萬石着漕運總督親身閱兌速行運至令其加謹照數收貯有此米石軍民心安而米價自不驟貴且與通倉無甚關係較之一年所缺之數亦屬無多至豫省漕糧該部亦應預行詳議今若雨澤及時田禾豐收則此項米石由水路撥給他處亦可也康熙五十三年七月初十日

諭刑部

朕聽政多年勤求民瘼刑獄之事尤所留心詳閱直隸
及各省題奏命盜各案自審結以至題請或踰時或經
歲部議又間有覆駁再令詳審者案內牽連之人雖咎
杖輕罪不免羈禁以需完結淹歷歲時離家失業至於
饑寒病斃者往往有之朕軫懷民命深用憫惻嗣後直
省刑名除重犯案內軍流徒罪仍應候旨完結外所有
杖罪以下輕罪著各該督撫於審結日即行發落不必
羈候部覆只於疏內逐一聲明務使無知罣誤之民早

得脫身寧家以副朕哀矜體恤至意其不關題請各督撫應自行審結發落者仍著照依舊例爾部即遵諭行
康熙五十三年十月十九日

諭南書房翰林

向來陞殿所奏中和樂章皆仍明朝所撰句有長短體製類詞後因文理不雅命大學士陳廷敬等改撰其章法皆以四字為句而奏樂人未易聲調仍以長短句法上下湊合歌之是雖文法易而聲調未易也今考察舊

調已得其宮商節奏甚為和平必得歌章字句亦隨詞
調則章法明而宮調諧此事所關最要著南書房翰林
同大學士等詳考定議務使章法與聲奏協和方為允
當再察明朝諸樂是何人創立規模法度一並詳明具
奏康熙五十三年十月二十一日

諭大學士松柱李光地蕭永藻王揆

朕無時不以民生為念巡撫係地方專責大吏理應實
心籌畫裨益民生年來浙江各府屬地方或有歛收之

處小民頗苦每覽巡撫王度昭所奏事宜未見盡心於民生真有裨益河南巡撫鹿祐所奏事宜亦未明當爾等傳問九卿康熙五十三年十月二十四日

諭戶部

朕撫御寰區勤求民瘼凡地方水旱災傷必詳加諮詢先事預籌其有荒歉上聞蠲賑頻施務令得所五十餘年來夙夜孜孜如一日也前因甘肅靖遠衛等處年歲不登民艱粒食已多方賑濟本年錢糧或蠲或停而山

地饒瘠民鮮蓋藏若不大沛恩施目前已自艱難來歲
更何倚恃這被災二十八州縣衛所康熙五十四年額
征銀九萬七千八百七十兩零糧二十三萬九千四十
石零草二百五十三萬七千八十束零俱著通行蠲免
行文甘肅巡撫實心奉行務使比屋均沾實惠用副朕
撫卹災黎至意爾部即遵諭行康熙五十三年十一月
十二日

諭戶部

朕臨蒞多年無時不軫念民瘼每歲於直隸及各省凡
民間暘雨期候豐歉情形莫不留心訪察雖在僻遠必
務周知偶值一二處災傷蠲免賑救不惜重費倉帑以
蘇我民困也近思賑濟災歉以速為貴必待督撫奏報
往返候命使小民嗷嗷待哺何如豫備積貯於平時則
所在有可恃之資糧而臨事免轉移之勞費今漕輓通
行太倉充裕江浙地方年來頗有歉收州縣應酌量截
留糧米分貯各處江寧原留五萬石今再截留十萬石

蘇州原留八萬石今再截留二萬石安慶截留十萬石
杭州原留十萬石今再截留十萬石皆於本年起兌內
就近截留令地方官加謹收貯至應動用之時著該督
撫題請爾部即遵諭行康熙五十三年十一月十七日
諭大學士松柱等

直隸各省州縣等官或革職或被叅解任或身故者妻
子尚能回籍其縣丞主簿典史驛丞等微員革職解任
身故者無力回籍羈留異鄉不免凍餒甚至有全家死

亡者即使犯罪致死亦與妻子無涉甚屬可憫且如各
地方鰥寡孤獨不能度日尚設立養濟院以育養之此
等微員理應撫恤自後將伊等作何令回原籍爾等與
九卿會議以聞康熙五十三年十二月二十日

諭大學士溫達松柱李光地蕭永藻王掞

朕觀宋儒周程張朱之學與四書相表裏為六經之階
梯平易精實有裨學者嗣後鄉會首場題宜減去經義
兩道改為性理兩道並用八股體式俾人士知所誦習

遵守以崇實學爾等會同九卿詳議康熙五十三年十二月二十二日

諭理藩院

今年蒙古地方雪大先曾聽見下雪不知近日如何着理藩院派善於馳驛好司官三員令其馳驛出張家口古北口喜峯口三處直至哨地盡頭處回來牲畜被雪倒斃傷損勿得隱諱因雪大特差看伊等牲畜即以此意告之凡經過旗分俱着問明回來康熙五十四年正

月十七日

諭大學士九卿詹事科道

科場出題關係緊要鄉會經書題目已有旨不拘忌諱
斷不可出熟習常擬之題朕常講易及修定天文律呂
筭法諸書人人皆知必以此等書擬題爾等皆係應點
考試之官雖朱派定何人然斷不可以此諸書出題表
題亦不可出修書賜書等類不然則人皆可以擬題倖
進真才何由而得張鵬翮為主考所出經書策論題皆

主理學意義相同彼雖無情弊而所取之人甚多僥倖人殊怨之趙申喬所取解元係倩人代作畏罪逃竄以致人皆不服趙申喬亦無言可以自解然彼不過觀其文章耳其中情弊何由得知故知出題乃大有關係之事再房官亦屬緊要如房官有弊主考亦無如之何今每一房卷可令不同省房官二人同閱如一人有情弊發覺二人並坐則各知畏懼互相糾察矣部院衙門司官凡進士舉人出身者皆係例應分房之人若學問不

堪不識文字何以衡文取士伊等亦宜考試或有非進士舉人出身情願考試者亦令考試再五經中式甚屬無益十七八歲之幼稚皆能之不過手敏多寫字耳殊無實學至於表判諸士子皆是平日讀就現成文字進場惟有抄寫並未構思或可易之以詩頭場文字七篇亦太多或用六篇爾等公同議之康熙五十四年正月二十七日

聖祖仁皇帝御製文第四集卷四

欽定四庫全書

聖祖仁皇帝御製文第四集卷五目錄

勅諭

諭大學士溫達松柱李光地蕭永藻王揆等

諭吏部尚書張鵬翮等

諭直隸巡撫趙宏燮

諭直隸巡撫趙宏燮

諭吏部

欽定四庫全書

聖祖仁皇帝御製文第四集
卷五目錄

諭吏部尚書張鵬翮副都御史阿錫鴈

諭大學士溫達松柱李光地蕭永藻王掞

諭吏部

諭議政大臣

諭議政大臣

諭議政大臣

諭議政大臣等

諭喇藏台吉察漢達席

諭議政大臣

諭議政大臣

諭大學士松柱兵部尚書孫徵灝等

諭戶部

劉宗周全集

卷五目錄

欽定四庫全書

聖祖仁皇帝御製文第四集卷五

勅諭

諭大學士溫達松柱李光地蕭永藻王掞等

部院滿洲漢軍及漢司官皆有辦事責任必謹慎勤敏始克稱職如有懶惰昏庸輕浮躁妄生事招搖疾病疲癯者豈容姑留又外省地方官內有大臣子弟及大臣保舉陞任之人恃伊父兄及保舉大臣更或倚藉師生

恣意妄行督撫掣肘俱不能約束即如居官清廉之人亦應素位而行謹慎自持豈可自恃清廉偏僻固執乎爾等會同九卿詳議具奏康熙五十四年二月初三日

諭吏部尚書張鵬翮等

張伯行着暫停革職看守審理伊疏內有不欺君并張元隆夥賊甚多將蘇州米糧買去等語巡撫係地方大吏管轄文武官員且有調兵責任若海中有賊即應率領官兵親身察拿況盛京山東江浙閩粵等省沿海地

方設立將軍督撫提鎮水師官兵原為海防而設張元隆等銀兩雖多沿海一帶官兵豈能盡行賄賂鄭盡心陳尚義等本係海賊頭目朕久已招撫拿獲今張伯行將伊等支吾搪塞希圖完事與伊不欺君之語殊為乖舛張伯行必深知賊巢始奏稱海中有賊務將此賊察拿審明具奏康熙五十四年二月初三日

諭直隸巡撫趙宏燮

朕嘗讀無逸篇留心稼穡久矣去歲臘前瑞雪盈尺時

屆陽節細雨連綿輿情怡悅早得布種矣所慮者起發太盛則收穫之際恐有二疸之虞爾等徧示民間時值耘耕即令苗稀䟽預防風霾朕以民生為念勸農為本已有所知不得不示特諭康熙五十四年二月十三日

諭直隸巡撫趙宏燮

朕每年春間行幸水淀近見民生雖不能家給人足比之往時似覺差勝但村莊之中誦讀尚少朕思移風易俗莫過讀書非此無可上進况畿輔之地乃王化所先

宜於窮鄉僻野皆立義學延師教讀以勉勵孝弟可望
成人矣爾即徧示莊村皆知朕崇文好學之深意特諭
康熙五十四年二月二十二日

諭吏部

趙宏燮簡任直隸巡撫已屆十年勤勞供職實心任事
旗民輯睦盜案稀少京畿重地趙宏燮着加總督職銜
仍管理巡撫事務特諭康熙五十四年三月初四日

諭吏部尚書張鵬翮副都御史阿錫鼐

張鵬翮等係特遣審理此案大臣欽交事件應盡心審明原委具奏這事情屢經前往審理並未將原委審明海中如果有盜賊張鵬翮等應同張伯行親詣賊巢查拿審明若海中無賊張伯行前奏不欺君之語乖謬顯然如此則事之是否自明其有應行請旨之處宜具奏候旨審理乃屢次前往未能徹底審明希圖苟且完事蒙混結案今又請將張伯行革職嚴審繕摺具奏殊玷官箴這事情仍着張鵬翮阿錫鵬前往徹底審明具奏

康熙五十四年三月十五日

諭大學士溫達松柱李光地蕭永藻王掞

自昔帝王敬天勤政凡遇垂象必實修人事以答天戒
今歲四月朔日蝕望又月蝕凡關係國計民生或有應
改應行之處爾等會同九卿詳議以聞康熙五十四年
三月二十七日

諭吏部

凡月選官員與民最親有關地方故令九卿驗看今僉

云未聞並未將不好者舉出若薦舉賢員數人同薦更好至舉劣員一二人即可舉出嗣後月選官員有出身不明係人家僕或捐還原職官員內從前居官有劣蹟者九卿各據所見即行指出與其到任叅劾不若初選時黜退地方亦不受害如此則吏治咸修民生大有裨益九卿諸臣務須留心詳酌將此傳諭九卿康熙五十四年四月初五日

諭議政大臣

八旗馬匹俱已出廠着照出廠馬數令佐領下殷實之家並該佐領人公派拴養照常給發錢糧目下雖稍覺煩難後來究竟有益如有行動則從此騎馬前去一到口上彼處之馬又到諸凡便益着詳議其拴養駱駝之處一併詳議以聞康熙五十四年四月十五日

諭議政大臣

總兵路振聲現率伊標兵前往路振聲係諳練行間之人朕所稔知策妄阿喇布坦人少此兵足以制之若彼

全力齊來似覺不足必須倍加籌畫相度機勢而行着
速行文提督爾等所議三處之兵派一大臣總統調度
此兵乃西安將軍所管之兵將軍親往不便又令大臣
管轄應派一能辦事大臣與將軍公同商酌而行着尚
書富寧安去派新滿洲侍衛十員前往効力現派法腦
隨富寧安前去祁里德原係大臣着授為散秩大臣前
往推河亦派新滿洲侍衛前去着派出呢牙哈出婁鄭
格令帶侍衛翎前往厄魯特巴爾虎之侍衛官員亦令

挑選帶去富寧安等馳驛前往進兵之時令從總督巡撫取馬匹牲口此二處派理藩院章京各一員西安總督料理軍務糧餉甚屬諳練巡撫亦好爾等議令巡撫料理糧餉甚是康熙五十四年四月十五日

諭議政大臣

昨日所議之事朕再三尋繹策妄阿喇布坦作何謀畧雖不知其實其到我哈密地方便不可為虛若彼傾國而來勢有萬餘我一總兵之力微有不足不可不預為

週備也應着右衛兵即刻預備八旗查哈兒厄魯特巴爾虎兵內挑選千名發往歸化城如用右衛兵時令其一同前往鄂爾多斯阿寶額駙之兵亦應令預備一同前去着詳議康熙五十四年四月十五日

諭議政大臣等

澤卜尊丹巴胡土克圖處着善於馳驛賢能司官一員速去諭胡土克圖云有策妄阿喇布坦二千兵前來被我哈密狗子厄敏並遊擊潘至善等領二百漢兵盡行

殺敗殺死厄魯特九十人生擒厄魯特三人將此情由
令胡土克圖速派人前往策妄阿喇布坦處去云中國
至聖皇帝大沛仁恩欲天下共享太平安逸過日爾無
故發兵被駐扎哈密二百漢兵並幾箇狗子盡行殺敗
今既被殺敗如何過日何不速遣使至皇帝聖前跪請
伏罪若不如此懇求必至盡行剿滅衆生靈亦遭塗炭
現在滿洲蒙古漢人並喀爾喀厄魯特各處之兵盡行
預備我係出家人但為衆生憐惜性命兼念舊好差人

指教於爾當作速跪請伏罪等語將此書稿繕寫呈覽
具奏發往康熙五十四年四月十九日

諭喇藏台吉察漢達席

喇藏汗因與朕如一家相好先前將噶爾旦丹津發往
策妄阿喇布坦去時朕曾降諭以為不可伊不聽朕諭
今策妄阿喇布坦似覺難於發回又現有我兵攔路朕
若彼時強將噶爾旦丹津力阻不許發去豈不好來今
朕亦不能無悔辟如朕將蘇爾札誑哄帶來不發回去

亦何不可但既為大君似此等事斷乎不行也如今爾
汗部下無人勢力微小蘇爾札多帶人去甚好今策妄
阿喇布坦無故前來將我邊境之哈密侵擾被我二百
漢兵幾箇狃子擊敗令不堪當策妄阿喇布坦以哈密
青海人等視為容易而來而不知者且謂我忌憚策妄
阿喇布坦豈知朕欲普天下一切大衆安享太平之至
意耶先前朕原欲與策妄阿喇布坦在和卜圖烏蘭古
木等處親身來會閱有言爾汗及策妄阿喇布坦不過

在偏僻居住幾人耳祈聖主憐愛衆生奏請從寬朕遂
中止先前剿滅噶爾旦時噶爾旦之骸骨並伊之女準
齊海并屬下人等我俱應收取方是後來因策妄阿喇
布坦將噶爾旦之屍首伊女準齊海鮮送前來其餘俱
賞與策妄阿喇布坦伊等俱被我數次殺敗心寒膽裂
此人盡知之現在喀爾喀厄魯特陝西四川松潘打箭
爐雲南貴州等處俱已備兵爾汗可放心安居矣在邊
口周圍居住爾等湯古忒之人等無知勿得妄生懼怕

致有亂動我兵斷不擾害於人也其將此情由告爾喇
藏汗康熙五十四年四月二十日

諭議政大臣

如今預備兵馬方好派黑龍江兵五百名並打牲索倫
打虎爾兵五百名又三處喀喇沁兵一千名每人俱着
各帶長鎗鳥鎗此二千兵內打牲兵丁黑龍江兵索倫
打虎爾兵着從口外往歸化城去喀喇沁兵着即騎伊
等牲口自本處起程其口糧到湖灘河所再支領倉米

倘口糧短少着支領唐三營倉米於八旗出廠馬匹內
給與喀喇沁兵丁每人馬二匹如同歸化城查哈爾並
右衛預備之兵發往推河地方駐札則不拘何處俱可
去得矣交與議政大臣議奏康熙五十四年四月二十
二日

諭議政大臣

喀喇沁之兵着噶倫兒帶去將他布囊色白派出侍衛
色楞放為副都統前去喀喇沁兵丁乃係用車裝載口

糧如車上另行派人甚屬費米着將趕車之人即充入一千兵丁數內索倫打虎爾兵着總管保住並哈忒虎之子衣里布帶往康熙五十四年四月二十三日

諭大學士松柱兵部尚書孫徵灝等

遊擊潘至善率領綠旗兵丁二百名擊敗策妄阿喇布坦侵犯哈密之賊衆二千人殊為可嘉非尋常可比前雖諭令賞給朕心猶為未足今再加賞給此二百名兵丁各給與把總劄付其中陣亡兵丁十餘人亦給與把

總劄付准伊妻子食俸今昇平日久兵革休息倉卒間
仍能如舊奮勇直前朕深為嘉悅因手書特諭着速議
具奏康熙五十四年四月三十日

諭戶部

趙申喬同戶部堂官等具摺面奏時不勝氣忿躁急奏
稱朝廷庫內帑銀商人等侵蝕二百餘萬現今銅斤不
能接續作速停止伊等採辦仍交與各關差官員方好
等語朕亦可其所奏思設法補完缺欠銀兩故將商人

所欠之銀俱清還戶部傳其採辦其所缺銀兩現今內
務府追補與戶部無涉今疏稱皇上神謀睿慮無微不
照朕治天下惟寬仁是務此等細事素不縈懷且非不
知為君者無庸干涉部院司官筆帖式辦理之事祇緣
此有關係故耳九卿所議甚是今又何必好勝以圖更
改疏內又稱現有買來銅鉛五百五十六萬三千觔交
完寶泉局五十四年銅額有餘等語既有一年有餘之
銅鉛前面奏時何不明白陳說為何如此躁急以致前

後互異錢法事務係戶部專責爾部仍須平氣屏私再行公同逐一明白議奏康熙五十四年六月初二日

聖祖仁皇帝御製文第四集卷五

欽定四庫全書

聖祖仁皇帝御製文第四集卷六目錄

勅諭

諭議政大臣

諭議政大臣

諭議政大臣

諭九卿

諭大學士松柱學士查弼納敦拜等

諭大學士松柱學士查弼納敦拜等

諭吏部尚書富寧安

諭戶部

諭議政大臣

諭議政大臣

諭大學士松柱學士查弼納敦拜星俄特常壽

諭大學士馬齊等

諭戶部

欽定四庫全書

聖祖仁皇帝御製文第四集卷六

勅諭

諭議政大臣

喀爾喀扎薩克王等着議政大臣會議宜給與一憑據
伊等所住地方相隔遼遠若當有事即互相救援甚好
況閔柱爾公之旗分尤遠居界外勢亦單弱喀爾喀等
都是一樣扎薩克倘有事故私去救援不知是與不是

大家觀望事必擔悞今哈密有信總兵官路振聲聞知
即行往救七日可到哈密今喀爾喀等著給與憑據有
信即相救援務俾不致有悞將此情由交與議政大臣
康熙五十四年六月初六日

諭議政大臣

據爾等所議欲將米石運至推河地方等語公閱杜爾
所住厄德爾齊老圖地方與推河相去不遠祁里德等
領兵在厄德爾齊老圖左近揀有好水草可以耕種及

魚獸繁多堪以駐兵之處移兵駐劄則邊地既便於打牲又可保護公閤柱爾等眷屬將米運至駐兵處所不但有益而進兵亦近着運米大人將米運至駐兵之處其所食羊隻欲在內地扎薩克喀爾喀扎薩克等湊取三十二萬等語此如許羊隻一時不能驟得且路遠趕送艱難着將達禮杭噶之羊五萬隻張家口瓦爾達所管之羊五萬隻推河左近之喀爾喀扎薩克等湊羊十萬隻共羊二十萬隻進兵時隨後趕進不但有益行走

亦甚便捷并亦容易可得其駱駝欲在內地扎薩克喀爾喀扎薩克等湊取八千隻等語內地扎薩克無有駱駝人皆盡知惟喀爾喀扎薩克一處有如許駱駝馬能一時驟得自推河地方所進之兵食米者無多且運到米石之馬騾亦可一併駝米前進也如許駱駝若無用處只向喀爾喀扎薩克等湊取駱駝三千隻亦足充用運米一節不可遲緩將此事另繕摺具奏即宜施行其餘事件俟祁里德等議奏到日再行定奪康熙五十四

年六月初八日

諭議政大臣

據富寧安席柱所奏今年進兵取土魯番等語今若在甘肅等處將馬匹喂養肥壯於九月間方取土魯番則適值冬令且伊地方太近不如仍照原議明年前進攻取為是這事情著交與議政大臣議和里德信息亦應等候再策安阿喇布坦曾有秋天兵至哈密之語總兵官路振聲力量單弱西安之兵既在甘肅等處喂養馬

匹着將甘肅提標兵發與路振聲助力之處議奏康熙五十四年六月初十日

諭九卿

近見甘肅巡撫疏稱固原等處地方今歲又旱田禾枯槁現今九卿會同速議但固原等十七處缺額銀米亦不甚多即分年帶徵被災之民斷不能完納應察明蠲免着九卿詹事科道將前事一併詳察速議康熙五十四年六月二十日

諭大學士松柱學士查弼納敦拜等

軍務事現今各省俱行捐輸若俟伊等所捐方行辦理或致悞事亦未可知軍務所需錢糧不多如俱動正項錢糧則事既不悞而且有益此外若有地方官再行捐輸者於事裨益更多著諭議政大臣併行文京城大學士及諸大臣等再從前議政大臣所議之事到部後曾經復奏現今議政大臣議復一切事件著該部俱照前繕本用印奏聞康熙五十四年六月二十二日

諭大學士松柱學士查弼納敦拜等

覽兵部為查臺站奏摺已有三十餘次臺站乃為軍機事務而設有應令特行馳送之事亦有應俟便發往之事若不論緊要與否一概馳送則臺站必致苦累將此傳諭兵部康熙五十四年六月二十八日

諭吏部尚書富寧安

朕因信任於爾所以此番將爾派出事屬緊要關係甚大凡事務仔細留心倘若無事行文將爾等制回設或

有事策妄阿喇布坦之兵勢一齊前來在臨近調轉之事曾經指示於爾但相隔地方遼遠有緊急事即飛馳報信來往需得二十日軍機之事不可遲悞爾親身到處有調轉之事不必啓奏即與將軍商議酌量而行再有新滿洲隨朕行走甚屬習慣在哨塘亦甚熟練者選派十名與爾隨往法腦係隨朕行走熟練之人哨塘等處甚屬要緊着隨爾去新滿洲之內有爾所知者令其帶往再與都統阿喇納同去之副都統吳昆人屬平常

而軍旅熟練爾在途間遇見即可帶回康熙五十四年

七月初二日

諭戶部

銅斤事情經九卿議覆結案商人所欠銀兩俱交部全
完工部寶源局所欠銅斤亦已清還毫無欠缺伊等應
賠內庫銀兩在內務府催追完結甚易與部全無干涉
今部以銅斤仍交王綱明等採買將拖欠銀兩分年坐
扣已還銀兩仍交內庫所議全不是矣若將銅斤又交

伊等以致再欠可乎錢法事務係戶部專責應作何辦
買銅斤不悞鼓鑄之處再議具奏康熙五十四年七月
初二日

諭議政大臣

博貝所奏將吳良海歸服有策妄阿喇布坦所屬在厄
敏處居住之厄魯特杜爾伯特丹津一千戶之人招撫
歸服若抗拒不服即行攻取似此動作以彰聲勢甚是
其間設有不睦致相仇敵聞博貝之兵前往以為大軍

將至紛紛擾亂便可得彼真信雖策妄阿喇布坦兵來
救援地方亦遠更有阿爾泰嶺之雪攔阻不能前進矣
博貝又奏稱臣有兵一千五百僅已穀用不求增益若
聖主以尚可增添有根敦扎薩克協理台吉羅卜藏之
所屬翁科時之兵扎薩克濟納米達之兵此二扎薩克
之兵原在和托古特一處行走與厄魯特攻戰熟練之
人等再有扎薩克台吉阿禮雅之兵亦善於破敵將此
三個扎薩克之兵添於我足矣其餘之兵既不知道亦

不求助着即將此三個扎薩克之兵添給博貝帶領此
兵前去遣人往吳良海處以好言安慰云爾等原欲歸
順我聖主今欲歸順應乘此招撫投誠若不傾服入於
樹密之處此乃無關緊要相其形勢行事可也至杜爾
伯特丹津以誠信確實差人招服大彰聲勢為要博貝
剿撫前去時若有策妄阿喇布坦之兵向我喀爾喀直
冲前來即着尋其後尾隨杜爾伯特之丹津與厄魯特
散秩大臣車領伊等係弟兄令車領差伊親信能人寫

給書信將現在所議之事發於博貝或派勤慎章京或
筆帖式作速飛馳并帶車領人同去即令前去之人同
博貝之兵一齊進發將此情由着交議政大臣議康熙
五十四年七月初二日

諭議政大臣

軍務糧餉關係甚要天時地利不可不通徹籌畫現今
運米一事朕甚為躊躇前日直隸巡撫河南巡撫奏摺
據稱牲口已如數起解又稱因雨水過多恐泥濘一時

不能得到等語看來今歲雨水實大此項牲口到湖灘河所定疲瘦不堪且前去路遠必至沍寒之時及至回來正歲底大寒人與牲口冷處不曾經慣必致大受傷損殊屬煩難所派大人雖竭力圖効亦無法可施及至奏請似覺誤事朕意將此旨抄錄與將軍費揚古並散秩大臣和里德等滿洲索倫蒙古兵糧若可以節用支持到明年五月則今歲預備齊畢來春青草一發即令運米如何議政大臣速行詳議具奏康熙五十四年七月

十四日

諭大學士松柱學士查弼納敦拜星俄特常壽

閱刑部奏章繁複者甚多皆由府州縣司道各官審錄
供招盡行全載所致該府司道果識有別情自應叙入
若無互異之處但註明該府司道與州縣各官歷審皆
同一語止將州縣初招並督撫等大吏審擬之處叙明
本內足矣若將前後陸續審報供招雷同備載徒使繕
寫重複案件亦至遲延戶部奏章亦有類此者着九卿

詹事科道會同議奏康熙五十四年十月初四日

諭大學士馬齊等

朕禮遇諸大臣甚優自始至終無不期其保全凡官員才守及居官之處靡不詳察朕曩巡狩至龍泉關駐蹕之日曾面詢趙鳳詔噶禮居官何如趙鳳詔奏稱山西地方官噶禮第一清廉一錢不要朕以鳳詔乃趙申喬之子斷不欺朕聽信其言屢擢噶禮至江南總督又奏稱婦女不失節乃當然之事居官不受賄亦當然之事


如居官受賄即與婦女失節等朕諭爾言雖則鄙俚誠能如此存心甚佳迨噶禮事敗後朕詢尚書張鵬翮曾奏趙鳳詔居官貪婪近晉撫蘇克濟摺奏趙鳳詔受賄甚多應行糾叅朕手批令其停止以俟悛改乃諭旨未到叅本已至今閱趙申喬所奏詞意忿激殊非大臣之體著飭行仍令在任供職康熙五十四年十月二十六

日

諭戶部

朕蚤夜孜孜軫懷民瘼四方水旱時勤諮詢惟恐閭閻之蓋藏未裕一遇儉歲收穫失望窮黎即無以資生也直隸順天保定河間永平宣化五府所屬地方今歲雨水過溢田畝被淹者甚多穀耗不登民艱粒食現今緩征賑借雖惠澤頻施而來春應辦錢糧若仍行徵取則民力匱乏輸將難繼著將五府州縣康熙五十五年地丁銀八十五萬五千八百兩零糧米豆穀一十一萬五千五百石零草九萬四千九百束零俱通行蠲免爾部

行文該督遍飭所屬實心奉行俾窮鄉僻壤均沾朝廷
德意倘有不肖官吏私徵侵蝕者察出定行從重治罪
爾部即遵諭行特諭康熙五十四年十月三十日



聖祖仁皇帝御製文第四集卷六

欽定四庫全書

集部

聖祖仁皇帝御製文第四集卷七
五

臣永琮恭校

侍讀臣孫球覆勘

覆校官中書臣龔禔身

校對官主簿臣郭祚熾

謄錄舉人臣潘炯

欽定四庫全書

聖祖仁皇帝御製文第四集卷七目錄

勅諭

諭大學士松柱蕭永藻王掞學士查弼納敦拜渣
克旦勒什布星俄特常壽蔡升元王之樞彭始
搏鄔士璉等

諭大學士松柱蕭永藻王掞學士查弼納敦拜渣
克旦勒什布星俄特常壽蔡升元王之樞彭始

博鄒士璉

諭偏沅巡撫陳瓚

諭大學士松柱等

諭議政大臣

諭大學士松柱等

諭戶部

諭議政大臣

諭議政大臣

欽定四庫全書

聖祖仁皇帝御製文第四集卷七

勅諭

諭大學士松柱蕭永藻王拱學士查弼納敦拜渣
克旦勒什布星俄特常壽蔡升元王之樞彭始
搏郎士璉等

凡事滿漢大臣應公同一心辦理兩議殊非善習

世祖皇帝時兩議之事甚少即間有兩議者亦滿漢大

臣公同署名具奏此制甚善至今遵行近見兩議之事
滿漢大臣各自署名此風漸不可長著吏部都察院察
議具奏康熙五十四年十月三十日

諭大學士松柱蕭永藻王掇學士查弼納敦拜渣
克旦勒什布星俄特常壽蔡升元王之樞彭始

搏鄰士璉

江南地方遼濶關係緊要江寧巡撫員缺未經補授安
徽巡撫梁世勲已令調來引見今總督赫壽又丁母艱

通省無一大吏印務交與藩臬署理關係甚大赫壽著
照常在彼辦事速行文左都御史范時崇星馳來署理
江南總督印務俟范時崇至江南接受時赫壽再行來
京總漕施世綸駐劄之處去蘇州甚近江寧巡撫印務
著施世綸星速署理其總漕事務施世綸照常辦理毋
致遲悞以此傳諭九卿康熙五十四年十一月初九日
諭偏沅巡撫陳瓚

朕御極五十餘年於誠偽公私之介詳加審辨萬幾之

暇勤求古帝王先聖治理無不專務誠敬屏棄虛浮先
行其言而後從之垂訓甚明是以朕孜孜圖治亦皆崇
尚實政不貴空言督撫係地方大吏凡關係民生興利
除弊有裨風化鼓舞士子果有真知灼見者即應竭慮
殫心見諸躬行以利地方若徒撫拾浮辭沽名要譽不
但無裨政治且恐有累民生即如張伯行初授巡撫時
即稱移風易俗家給人足報効朝廷迨後絀於才力張
弛失宜反致漸生事端擾累民生地方盈寧之狀迥不

如前此非不能身體力行言過其實之故乎今覽陳瓚
條奏數款皆伊職分內應行事宜當於力見施行後再
行具奏乃將空言妄陳殊屬無謂且督撫身任地方最
重者年穀順成民生樂業陳瓚甫授湖南巡撫衆災紛
紛此必撫綏安輯未盡其道上千天和之所致也疏稱
湖南徵收錢糧每兩加至一錢二三錢不等並不指明
加徵起自何年趙申喬昔任偏沅巡撫時居官甚清知
其於加耗一事禁止甚嚴今覽陳瓚所奏豈是趙申喬

亦未曾禁止耶陳瓚身係撫臣一切事務不圖躬行實踐將久經定例禁止之事故張大其言沽名條奏殊玷官箴加耗起自何年何撫著陳瓚即行指叅康熙五十四年十一月十一日

諭大學士松柱等

前曾屢次議將張伯行拿問朕念伊居官清廉不受餽送故雖經革職而伊缺亦未經補授今調來引見甚糊塗無知實非堪任巡撫之人但能杜苞苴操守甚好於

錢糧無多之處令其管守於商人錢糧俱有裨益其傳諭九卿康熙五十四年十一月二十三日

諭議政大臣

現在議政所議之事既現在等候信息乘此時將八旗漢軍及漢人內有家道殷實情愿自備軍前効力者并候缺人員作速傳集著吏戶兵三部查明具題引見先期發往俟遣往大臣到日將地方官內有不堪劣員即行革退將伊等補授於事有益不致有悞矣康熙五十

四年十二月初九日

諭大學士松柱等

武官不論大小朕俱親驗補授各於營伍事務黽勉効力部院滿洲司官今入侍衛班次行走漢官亦時常引見所以俱各勤謹惟外省州縣官員雖調來引見仍未
能周知九卿大臣俱有言責伊等亦當留心可傳諭之
康熙五十四年十二月十二日

諭戶部

朕統一寰宇宵旰孜孜惟以年穀順成民生康阜為念
故凡地方水旱情形必時加諮詢其有歲偶不登即詔
所司亟行蠲賑五十餘年來未嘗稍懈前因甘肅靖遠
衛等處年歲歉收既已多方籌畫蠲賑頻施復將甘肅
被災二十八州縣衛所康熙五十四年額徵銀糧草束
通行蠲免但被災之餘民鮮蓋藏若非再沛宏施恐來
歲辦賦猶艱除寧州隴西渭源狄道臨洮五州縣衛五
十五年額徵銀糧草束已經蠲免外其靖遠等二十八

州縣衛所五十五年額徵銀九萬七千八百七十兩零糧二十三萬九千四十石零草二百五十三萬七千八十束零亦盡與蠲免諭旨到日該督撫即遍行曉示俾遐陬僻壤莫不周知務期均霑實惠以副朕軫恤邊民至意爾部即遵諭行特諭康熙五十四年十二月二十三日

諭議政大臣

大兵行動運送糧餉安設臺站牧養馬匹等事俱係領

兵將軍責任今米糧不能運至皆由砂磧地方水草用
竭之故昔朕曾親領大兵在無水草砂磧地方走過所
以深知耳中路出兵時沿途留下一邊水草處行走以
牧放牲口爾等大臣所親知者身為領兵將軍而此等
事務全不知曉閉目直前致沿途水草如火燒赤地後
隊兵馬及運米牲口有不至窮窘者乎朕曾屢向衆大
臣云領兵大人甚難凡事用心不可不周到今歲停止
進兵候種地及一應物件預備完畢審看兩下軍情再

行定奪之說即為此故也且去年哈密二百兵丁殺敗策妄阿喇布坦時衆大臣俱欲進兵如果彼時即行進兵路途遙遠糧米焉能接濟現在駐劄食用糧米尚不能接續以致如此遲誤若即進剿不知作何景況矣如喀爾喀一路將軍穆塞祁里德等所統之兵俱係滿洲蒙古行走經練之人並無糧餉不足等事席柱等雖係精兵因不曾行走經練所以如此現在兵馬倘致饑餒糧若不到關係甚大行令將軍席柱提督師懿德總兵

官等著仍駐彼處於兵丁內酌量汛守調遣足用之數
留用其庸懦不堪者著會議撤回此兵回來時器械斷
不可沿途遺棄若有行走處將此經練之兵發往此事
議政大臣等所議周詳著照議速行康熙五十五年二
月初一日

諭議政大臣

差往策妄阿喇布坦之克什圖保柱並澤卜尊丹巴胡
土克圖之使人及策妄阿喇布坦到澤卜尊丹巴胡土

克圖之使人潘提忠內等俱已來到朕俱詢問其策妄
阿喇布坦情形皆已悉知策妄阿喇布坦乃係巨猾奸
詭之徒甚屬無耻抵死賴說朕之使臣非係使臣旨意
非係旨意是部文等語今爾諸大臣等向克什圖保柱
等詳詢策妄阿喇布坦情形將目今差去之使臣克什
圖保柱并胡土克圖之使人初陽托音及策妄阿喇布
坦之使人潘提忠內等一同遣往此事乃係大事將作
何遣往等處著諸議政大臣會同副都統以上並九卿

大臣等各陳所見詳議再傳諭與漢大臣等從前但以
兵馬糧米牲口路遠難到為念今兩路兵馬糧米諸凡
齊備悉已現成祁里德等之兵米剩有二千餘石在彼
收貯而西路之米亦皆陸續運到兩處之米委屬充裕
無容計慮今將運米之事稍緩為善於牲口亦屬有益
去年隆冬嚴寒之際尚且將兵米俱已運到況今夏月
正草發之時更有何慮乎朕從前中路出兵時曾於沿
途按站留米令煮粥以贍營中困乏饑餒之步行跟役

并貿易人等大有裨益今亦令兩路進兵之站每站留米二石如此則運米之牲口駝載亦可輕便且每站若皆有米則人斷不致死於饑餒策妄阿喇布坦鄙猥之徒何足為慮我惟以人之性命為緊要耳至將軍席柱原係做過護軍叅領及侍衛之人朕所稔知亦曾臨陣對敵第漢仗好而人無主見一應軍務糧餉俱將軍責也伊云我統領兵馬運米之事與我無涉糧到我行等語可見席柱無將軍之材將此處著諸議政大臣確議

再總兵官路振聲一聞侵犯哈密即行圖効領兵往救
且聞伊愛惜標下兵士甚屬出力著路振聲入議政賞
與翎子擬策安阿喇布坦奏懇遣使一賢能大員等語
伊並不認罪不遣人來若我令大員前去殊不相稱其
克什圖保柱出使策安阿喇布坦處所已經數次今若
加大銜與克什圖保柱差往前去即係大員矣再凡為
使臣者果能一體同心於事方克有濟若內有不睦互
相掣肘彼此言語矛盾一有差失則無益於事伊等有

不合處即當明言為是再派出在京一人偕克什圖保
柱前去此處亦著大臣會議朕寫旨意時令克什圖保
柱等面看繕寫伊等謂有未宜處朕即改之其再明示
諸大臣我兩路兵馬牲口糧米一應俱已齊備兩處軍
中業已種地秋季可收此番使臣到策妄阿喇布坦處
伊或認罪俟得其究竟如何之時將我大兵逐漸進至
伊地止說會講遣往伊既可以遣兵二千到哈密會講
則我護送使臣前往之兵並非進剿之大兵亦無不可

也康熙五十五年三月初十日

聖祖仁皇帝御製文第四集卷七